

四庫全書

集部

欽定四庫全書

集部

吳文正集卷七十三  
四

御史<sup>臣</sup>邱文愷覆勘

武英殿纂修中允馬啟泰

欽定四庫全書

吳文正集卷七十三

元 吳澄 撰

墓誌銘

故逸士熊君佐墓誌銘

富州之甲氏熊為盛而不一族橫岡之族其先知制語  
龍圖公之後縣鄙徙至諱之翰者早世其配周氏以媿  
之子為子實丞相京文穆公之從孫諱禮娶從事郎王

尉之女生子四仲諱大經娶韶州周守之姑生子二君  
佐諱師賢其長也幼敏悟長治進士藝馳俊譽叔父貢  
士暨鄉先輩皆期以早達僅一試貢闈而科舉廢讀書  
娛親於山至元壬午先廬燬隱城市十年父既歿養母  
能盡歡大德辛丑築室還故鄉扁其堂曰寓樂與老梅  
踈竹叢桂幽蘭細蒲怪石俱便坐掃地焚香琴書圖畫  
羅列後先尤嗜古器玩嘗學琴後不復操曰但識琴中  
趣爾惟工詩不輟一時吟人咸相推許弟師周同居同

財三十年無間言暇日弟若子相賡酬自為師友乙巳  
罹母喪哀慕幾欲無生其明年冬感疾丁未夏四月竟  
弗起年五十有三秋七月壬辰晦窆于卦塘栖龍山之  
陽初娶監吉州糧料院李登孫女再娶戶部侍郎鄧詠  
孫女男希勉女適胡宜審孫寄生子移疾寓富州先葬  
期師周以書將前太學進士徐懋初狀因子妹壻周筠  
來請銘筠謂君佐敦厚篤實好賓客而不妄交希勉篤  
實如其父徐之狀亦云辭翰清粹端健為詩冲澹瀟散

不求工而自理致予雖不識君佐其槩可觀已嗚呼向  
之科舉誠不足得士然拘以定法乖逢一制於命非可  
以苟求得不得者安焉自科舉法廢而進仕之途泛人  
人懷希覬速化之心離親戚棄墳墓跋涉攀援百計干  
入經歲年敝衣履犯風雨寒暑或至破家殞軀而不悔  
愚亦甚哉君佐之才豈不可以翔鷲以其清致出而與  
今之君子遊必有合也而安分知止澹然無營於世以  
終其身可不謂賢乎往年予被命徵為國史官弗果赴

今幸補外閒散無編纂之勤每欲述野史以自嬉凡山林恬退有足稱者具逸士傳若君佐其可銘曰

羣動芸芸濯其渾獨立斷斷咀其芬有美逸民清意存貞於堅珉麗千春

故待補國學進士何君墓誌銘

予移疾還家道過清江皮氏留再月有衣大布之衣介皮氏來謁問之何其氏與道其名揖之坐作而請曰與道之兄有道弟安道是為待補國學進士君之子先君

諱應子字奕夫世居清江縣崇學鄉之彭澤生宋淳祐  
辛丑弱冠喪父奉母聶氏理家刻意學業師進士周先  
生由詞賦改習尚書義甲子庚午秋貢俱以補弟子員  
待試國學與熊夫人之從父前進士介游從講問最密  
科舉既廢隱處絕仕進意峩冠博袖延師教子弗怠他  
境嘗有逮捕根株幾蔓出身扞蔽同井賴以無擾歲饑  
平糶以濟族姻貧不克葬捐貲以助人有急必賙有負  
未嘗責不幸於大德丙午五月四日終將以丁未四月



某日葬某處之原與道兄弟痛惟先君與總管皮公世  
姻世鄰荷待遇特厚先生善皮公於公之所厚能無情  
乎倘俾一言光於幽不惟先君長逝不恨而其遺胤與  
有校焉予曩聞皮公言彭澤之何為儒族其先彭澤縣  
人官于吉因家於此其後有陽山令致仕來歸遂名其  
地為彭澤以志其祖之所自公又數稱奕夫為善士噫  
公之言足徵而其子又請之勤勤是可銘已君娶熊氏  
子三男三女孫二男三女盧應開熊文瑞楊德懋其壻

也父諱夢龍大父諱泳曾大父諱珉並隱德弗耀夫善積者慶餘以君之善其蕃其昌不在後之人乎銘曰積之厚其究也楸前所留維後之休

許母王氏夫人墓誌銘

昔年予以童丱就郡學補試同邸有一先生長者視予所作賦勉而教之試畢各不問名居而去後八年予忝鄉貢工歌鹿鳴之燕向所見先生長者亦在焉問之則臨川許先生功甫也其年為江西轉運司所貢士遂相

款密自是數歲間或一見情誼如父子師友先生每言其族中諸少之可進者必稱如心越數年予同升貢士金谿何伯陽過予以如心所述母夫人王氏行實請銘如心之父登仕君諱恭功甫先生弟也初娶黃生子三曰直心曰敬心曰如心再娶王生子二曰原心曰惠心王為右族擇壻甚嚴登仕君失元配乃議以夫人歸許夫人慈順詳審工女事畧通詩書大義處內睦而敬御下寬而肅躬勤儉而有調恤心夫所友子所師待遇悉

以禮亂離中值母喪哀毀憔悴喪既除中寒疾不起明年正月葬熊坊新莊山如心五歲無母夫人鞠育如已出原心痛其母不得年思以貽不朽伯仲二兄已先卒而季兄如心為之請禮曰繼母如母傳曰繼母之配父與因母同故孝子不敢殊也如心能若是可以為士矣予既與登仕君之兄厚且知如心伯陽又言之勤勤閱所述證所言夫人賢婦人也銘惡可辭夫人諱某生二十八年而歸歸八年而逝逝餘月而葬生之歲癸卯歸之歲

庚午逝以丁丑之冬葬以戊申之春葬三十一年而始  
得銘銘曰

得所豐者賢所嗇者年猗嗟乎天

故太醫助教程妻駱氏墓誌銘

補太醫助教程君諱遠之妻駱氏撫崇仁人年十有六  
歸程六十有六而卒生三子至元辛巳七月太醫君卒  
次月長子亦卒惟仲季在其仲鵬舉言吾父以醫術客  
高門巨室無虛日賴吾母主饋勤儉克有田廬敬事舅

姑事祖姑如姑姑之父母依於我亦如之於娣如婦族  
媼中外恩禮惟稱延名師教子為儒嫠居二十年冠昏  
二子嫁幼女畢還見諸孫乃老吾程氏之先自河北廣  
平來仕江南而家新安自新安分處他郡九世祖尉崇  
仁官滿不去墓在縣東門外之三山吾母未葬長老咸  
曰此吾族賢婦祔先兆宜乃營墓左百步之外將以丙  
午閏正月丁酉窆願求一言麗諸石子幼識太醫後與  
其子游過其家見其子禮賓之勤而知其有賢母也其

母生端平丙申十月卒大德辛丑八月鵬舉暨弟鵬飛  
儒而世其父之業家設藥肆售不以履女子子三適孫  
適黃適吳俱已亡孫男五孫女五銘曰

程氏初祖自昔少府爰宅茲土八世聯綿有婦貞賢祔  
於其阡

魯國太夫人王氏墓誌銘

魯國太夫人王氏資政大夫前御史中丞王公某之子  
故昭文館大學士榮祿大夫平章軍國事行御史中丞

贈純誠佐理功臣開府儀同三司太傅上柱國魯國文  
貞公喀喇氏諱博果密之妻嘉議大夫太常卿回之繼  
母也王公正直和易為時端人夫人生長名門天質純  
美父教母範閑習見聞懿德夙成如古淑女年及笄字  
謹選所歸會喀喇公喪初配議者咸曰貴族重臣有行  
有學可妻宜莫如公遂以夫人歸焉夫人沈靜寡言廉  
儉中度克相克順官事無違禮於族姻仁於媵御閨門  
之內雍雍如也暨喀喇公薨屏居一室稱未亡人非歸



寧不至門外男曰媯女曰宜童視前夫人子均愛如一  
公薨之十年恩封魯國太夫人其明年以疾終祔於宛  
平東安祖姑之塋生之日至元乙亥六月辛酉薨之日  
至大庚戌三月癸未越七日己丑窆常鄉與予游子國  
子師而媯國子生也請曰宜為吾母銘乃銘銘曰

婉婉女士嬪於相家令德令儀允也柔嘉嫠居十年志  
義貞專所天一天誓從九原昨封大邦以榮厥躬云胡  
不遐遽爾長終若防若堂尋有四尺婉美維何視此堅

石

元故嘉議大夫饒州路總管趙侯墓誌銘

至大二年四月乙丑嘉議大夫饒州路總管趙侯卒於  
官四年秋侯之子克敬走京師因侯之壻高希元來請  
銘高與余遊余是以知侯之概則不復辭乃序次其家  
世行事而銘侯之曾大父諱贊家大定金忠顯校尉主  
長葛簿大父諱整有武畧不試父諱來廷善騎射上蔡  
縣都統金失汴歸國朝從郝元帥經理陳亮穎招撫邊

民有功歷使三州遷陳州長官因家於陳有旨授潁州  
節使終於潁時候之年甫十有三魁偉能謀弓馬閑習  
罷局如成人朝命襲父職知州事凡五潁邳莒息淇也  
貳一路凡再鄂益都也長一路凡再瑞與饒也初階武  
畧將軍進武德宣武明威又進懷遠大將軍改嘉議大  
夫仕五十有三年壽六十有七母何氏外祖某縣尹侯  
諱庸外和內剛與人交靡不心說恬於利欲知經史大  
意所至興學校為務聽訟必諭以理俾自悔悟不尚刑

威故囹圄常虛其在鄂也值權姦之黨專一省之政掎  
克戕民所屬化之姦黨既敗鄂之官悉以贓罷惟侯獨  
任府事其在瑞在饒也瑞產銀饒產金常課外官吏並  
緣侵漁侯設方計除其弊有遺愛焉侯之喪至自饒弔  
者千數生而令人愛死而令人哀有以也夫娶陳州節  
使史進忠女生男三克敬克讓克勤女二某年月日葬  
於陳之東南五里鄉曰孝義村曰紀城銘曰

柏翳趙祖興自造父繇鄉遂侯以食晉土其苗其裔因

國著氏秦漢而來代有顯仕桓桓潁州經野底績爰嘉  
乃勞施及世適宅是宛邱光啟饒侯用宏家聲克纘令  
猷牧於九城允也良吏我銘孔昭昭哉遺惠

元故少中大夫吉州路總管劉侯墓誌銘

功德被於民其民生而父母之沒而神明之古之賢牧  
伯若是者蓋千百不一二而今於吉州路總管劉侯見  
之侯諱執中字仲和世為汴人曾祖諱誠仕於金司臬  
事囚有寃直之不能得即日棄官去祖諱錫不仕考諱

安武舉及第累遷至懷遠大將軍鄧州節度副使金亡  
北渡家大名妣呂氏汴名族侯三兄曰珪曰璧曰璋其  
仲翰林國史院編修官侯少負志節長而益奮種學績  
文以裕所蘊同里竇文正公竒之妻以子既從竇公悉  
得其學餘力所及猶能以鍼醫名天下父喪哀毀兄欲  
分異固持不可以老壽大司徒王贊善薦獲事裕皇於  
東宮世祖皇帝定朝儀同太保劉公進禮樂圖稱旨召  
見於仁智殿初授奉議大夫充左侍儀使太廟署令再

授朝列大夫尹濱州副淮西宣慰入為侍儀司引進使  
又授少中大夫總管江陰吉州官三轉職七遷年五十  
五而終事裕皇時陳說國本之重宜謹禁禦其後盜殺  
權相幾犯宮闈緣是始設兵衛人皆服侯之先見濱旱  
祈禱逾月侯至之日屏去僧道巫覡率僚屬齋沐虔告  
渤海東之神曰天久不雨民且無食吏實可譴民其何  
辜三日澍雨沛洽耆老詣侯謝士獻詩文以頌侯辭曰  
天之澤也君相之德也守何力之有淮西地曠人稀勞

徠其民給以田宅流逋四歸遂成樂土其在江陰也歲大水請賑貸倡同僚暨富家出粟補助以俟命下繼發官倉全活甚衆前時納稅準直以中統楮幣如舊宋楮幣之數賦於民民不堪力陳其敝於省酌損之柄國者議徙江南豪族於京師官督屬郡起遣輿情大震侯故為遷延未幾事寢所至首視廟學修完勉勵其在吉如在江陰而化賊為民尤表表可稱吉素難治遠鄙怙險僻連歲與鄰界谿洞相構扇羣聚為寇侯自將捕逐重



賞募官民材伎徑擣巢穴斬其渠魁乘勝追擊俘獲男女數千輜重稱是餘黨悉平良民復業者七千餘戶明年湖南寇侵侯復進兵諭以福禍寇窮感納款撫慰各令就農是役也自夏徂秋跋履深阻中嵐瘴毒力疾綏降附輯散亡惟恐或後而疾竟不起沒於安福州之陽澤賊酋衰經哭送越竟士民相弔咸曰侯提兵以出者再秋毫無擾徵侯何以有今日立祠於陽澤歲時報祭焉侯孝於親弟於長文友殫始終之義中堅正外審詳

民樂其慈吏怛其威蓋文儒也而優於武畧達於吏事是以能然竇夫人賢淑聰慧日記千言嘗作勤學文警諸子雖古女師何以尚先九年卒侯之子元麟由吏部侍郎授嘉議大夫大名路總管駭萊蕪縣尹驥太子通事舍人參少中大夫典用大監駿國學貢士庶子一侯之壻大名路梁侯之孫鐸陝西右丞許公之子崇智左丞張忠宣公之子僉廉訪司事某侯之沒元貞二年九月十二日也旨勅中書命有司護柩北歸殯以大德元

年四月中旬之六葬以皇慶元年正月上旬之十墓在  
大名郭東元城縣令公鄉先塋之次夫人竇氏祔先葬  
期狀行與事徵銘於國子司業臨川吳澄臨川與吉接  
壤計前後吉守如侯者鮮矣閱其狀叙而銘之銘曰

大江以南有侯之廟大河以北有侯之兆體魄歸地永  
寧于茲英爽在天宜無不之民曰吾父世食吾土風馬  
雲車莫魏朝楚令公之鄉其封若堂有煜其光具此銘  
章

故文林郎東平路儒學教授張君墓碣銘

君蜀人也姓張氏諱顛字達善世居永康之導江曾祖  
廣成贈承事郎祖諱汝舟鄉貢進士父諱瀛特奏名迪  
功郎江州彭澤縣主簿母黎氏蜀有兵難主簿君從其  
外舅監丞黎公出蜀寓浙君生始四歲主簿君携以見  
秀巖李公西山真公俱目為竒童年十六而孤奉母居  
海濱師其先友業進士詩賦弱冠以蜀士流寓試不中  
改試春秋義平舟楊公棟勉之學義理之學年二十七

師金華魯齋王先生栢君有才華以所讀書十數條演  
繹其義質於師不答君請曰某不敏願先生啟發之乃  
出君所論指示之曰若所論昔人已嘗如此云云朱子  
所不取也俾讀論孟精義自此君得聞所未聞既而平  
舟楊公罷參政居台而台之趙守及臨海趙令並喜講  
學君造請其間多所資益游錢塘出入翰林史館禮寺  
習知故實還台省母屬天兵南來家殲焉君煢然一身  
授徒自給初以浙西按察僉事夾谷公薦授將仕佐郎

建康路教授遲遲四年始之官未及一期而代再以行  
臺御史中丞徐公薦授登仕佐郎孔顏孟三氏子孫教  
授顏孟家廟歲時以俗禮薦為制籩豆更定祭儀畀其  
家申請正顏孟配位南向之失升曾子子思配饗以周  
程張邵司馬朱張呂氏九儒從祀及其他便益事宜非  
一秩滿郵城士大夫具書幣迎致以淑其郡人留四年  
學徒自遠而至者日富教聲洋溢乎中州有以國子監  
官薦者授文林郎東平路教授引疾不赴歸於儀真依

江東宣慰使沙卜珠公以處君自幼敏悟氣毅而容肅未嘗一日廢書經史傳記禮樂名數靡不研究教人讀近思錄為四子階梯四書以朱子章句集註為本次讀儀禮詩朱氏傳書蔡氏傳易先朱子啟蒙本義以達程傳春秋胡氏傳張氏集傳讀史及諸子百家定其是非邪正作文書字亦各有法講說明暢援引該贍粲然皆成文辭音節抑揚中度聽者莫不竦服其所著述有四經歸極孝經口義喪服總類冕弁冠服考引設訓蒙經史

入門闕里通載淮陰課橐等書及文集若干卷年六十  
七以疾終大德壬寅六月十七日也葬於揚子縣甘露  
鄉三城里蜀岡之原以前配馮氏祔再娶黎氏外族宣  
教君之女生女二人長延秀通詩書大義嫁門人保定  
王元次延穎許嫁真定李某至元丁亥予識君於建康  
其後予客東淮又與君之所交所教者遊故知君為深  
至大辛亥王元走京師求文表君墓嗚乎講明朱子之  
學以授學徒使人人聞風敬慕能如君者鮮矣而不獲于時又



無嗣僅有女傳業疇不為君惜况知君之深者乎於是  
叙次其事而繫之以銘其辭曰

煌煌陳編茫茫緒言彌演彌繹波滔蔓延孰得其珠孰  
買其匱維占是呻奚告非瀆曰若石師泯焉夸毗孰為  
省之孰令領之猗達善父蘊茹今古颺馳霆訇壘壘音  
吐異耳賊異金玉師傳爰著斯嘉耀於荒阡

元贈奉政大夫高唐知州驍騎尉封鄆城縣子

姚府君墓碣銘

姚姓之著者梁國文獻公相唐少師文獻公仕皇元少師之從子翰林承旨燧以文章名承旨嘗與今朝散大夫江南諸道行御史臺都事居敬言吾姓蓋同所自出朝散繇臺察省部發身初任承務郎工部主事遷承直郎江浙行省都事陞奉議大夫兩淮轉運副使丁內艱服闋除江西行省理問改除奉政大夫僉浙西道肅政廉訪司事蒙恩贈考妣官封鄆城府君諱顯其先大寧人金南遷府君之父忠以右班扈從至汴家睢陽金七

徙家濟寧之鉅野府君以材武應募行宥府檄長百夫  
平南之役師次揚州與宋軍遇冒矢石力戰以死年四  
十二娶龐氏亦大姓也其兄弟皆勇士中原未定時東  
土效攘矯虔者蜂起府君率姚龐二族保有邑聚寇不  
敢犯全活甚衆亂定甫為時用才志未展一二而終閨  
者惜之延祐四年贈奉政大夫高唐州知州驍騎尉追  
封鄆城縣子夫人龐氏追封鄆城縣君男四人長朝散  
也自浙西佐行臺次思讓次居安次居禮府君終至元

乙亥夫人終至大辛亥歸葬鉅野金垞山之祖塋將碣於墓徵臨川吳澄文乃為叙而銘焉銘曰

桓桓鄆城勇冠千兵前茅摧鋒英毅留聲生不食報維後之嚆嗣興有人克慎厥操皇汝子嘉寵被幽遐五命爵勲百世光華金垞之封有石崇崇皇澤之隆維以勸忠

史振之墓志銘

史振之少孤佩母訓唯謹內外事無不稟命家雖菲薄

甘旨畢具稍有贏餘輒分及族人見一善行心識力行  
平居無疾言遽色接人溫溫如也孝友平恕蓋天性然  
家世汴人金季徙燕曾大父以下俱葬京城南門外大  
父伯賢仕金主縣簿父正甫業儒年三十而卒母西京  
趙氏金宣武將軍任州羊山倉草監諱振之女年二十  
七而殘子生始八歲歸父母家父母數令人微諷欲奪  
其志確不可移後聞將許人即觸柱流血誓曰母子苟  
無以養丐食猶可何至為禽獸行議遂寢自夫亡美麗

服飾悉屏不用言動依於禮法有烈丈夫風治家勤儉  
有恩親知尚其志節將白有司加旌表語其子曰婦德  
固宜何異之有每見他婦沽名無實心以為恥我若苟  
此與彼等耳汝亟止之振之為祿養任江西權茶提領  
將母而南僑寓真州至元甲申四月母卒衣䟽食糲居  
外寢三年未幾得疾數歲不愈終之日至大庚戌八月  
二十五日也娶完顏氏早卒繼曹氏生一子二女至元  
丁亥四月卒繼王氏子師魯亦娶王女適劉適丁曾孫

二俱幼師魯恪愿從余學將奉其祖妣暨考妣三喪葬於魯盖曰其先魯人也余故為之志伯賢諱遇正甫諱仲侃振之與澄之大父同諱從金從暉云銘曰

烈烈母儀子子也宜猗嗟振之仰孝俯慈不鴻厥施而燕厥詒以全而歸而藏於斯

吳文正集卷七十三



欽定四庫全書

吳文正集卷七十四

元 吳澄 撰

墓誌銘三

故樂溪居士吳君諱伯成字文甫瑞高安樂安里人其先

樂溪居士吳君諱伯成字文甫瑞高安樂安里人其先  
自九江而西山而筠之五鹽今高安仁孝里也十世祖  
誦敦書崇義富甲一鄉八世祖文海以明經見稱愛樂

安山水徙而家焉曾祖仁昺祖世經韞玉弗銜父應祥  
與鄉貴劉公應龍善嘗於廣東制司奏辟迪功郎監寧  
江鎮弗就君少從姚公勉學舉子業姚公進士第一立  
朝以言事不合去君亦厭科舉隱居自樂庚申兵後歲  
大饑奸暴竊發君出粟賑施寇攘遂戢時出粟弭盜者  
許奏補官君笑曰此豈邀功賞時邪庚午歲又大饑芋  
饑相枕藉君復發粟賑施且為食以待饑者得全活數  
百千人秋成貸者倍取息君獨不爾貧不能償焚券不

問人有患難極力拯救或忿怨至不可釋得君一言輒  
愧服渝平收撫孤遺教育婚娶人皆德之而君不自以  
為德平居未嘗疾聲厲容不喜言人過所居山水峻駛  
溪流清湑平鋪石磧上如織文紆回里許直抵石壁下  
徜徉其間竟日忘倦故相章公鑑取知者樂水意書樂  
溪二字扁其堂歲丙子兵禍延毀處之泰然重葺家塾  
勉諸子勿廢學陳公仲微隱南海不返賓從留故山君  
擇其賢者與為師友父喪哀瘁致客數郡畢至其事親

也孝其教子也義其處己也厚其與人也惠生宋嘉熙  
戊子六月終大元大德癸卯二月終之日戒子孫曰汝  
祖父以忠厚傳家宜勉學勿墜言訖而逝娶黃繼徐子  
男三泰來大有鼎元女二適朱適陳孫男七鎡鑑欽塤  
均增法保女二曾孫男三安孫勝孫慶孫女四泰來後  
三歲卒大有將以皇慶二年正月某日奉柩葬於里之  
邱橋原先事清江宗人中以前進士劉方大狀來詣臨  
川為其孤請銘噫高安清江臨川雖異郡而氏族同一

原清江之宗能為之請臨川之宗不為之銘可乎乃叙  
次其狀而銘曰

吾祖泰伯以天下讓代有聞人名節相尚維居士君既  
富且文鄉人懷只睇此高墳

故鄉貢進士鄭君碣銘

君諱松字特立初名復貢於運司者再貢於鄉郡者二  
三試禮部不中嘗以詩文見知郡守會郡守救荒有富  
戶閉糶將加之罪君為救解得免富戶恩之結為婚姻

以家事托富者死家之寡幼咸聽命焉一統之初新民未諳新政吏乘時為暴利寡幼之財悉於君乎求取肉既盡而虎狼吞噬如昨無厭及我君竟坐視而貧君視財如糞土不惟求取者灑然與之不吝雖給使令之人資用不會其贏縮故貪詐咸樂為役德祐間大軍逼境制置使左次於撫崇裨浚隍募人鑿鴻鶴山復盱水故道灌注城下君應其募制置司賞以官且捐沒官田租八十萬俾練莊戶為兵既革命猶有圖興復者檄君為

助君以民兵應之其卒勇敢獨能與大軍遇多所殺獲  
俄而卒戰死者衆遂潰君避入溪洞遇赦乃出少學詩  
於鄉之曾明卿又學於贛之曾子實有唐山初稟晚稟  
在中歲與予為友聽予說諸經諸子領會悅懌予所校  
四經三禮悉命筆工抄寫促予著書予曰少俟君即自  
為之雖范淳夫之信程叔子不是過也間成一二示予  
予謂尚宜修改故其書未出然好事者亦或傳錄以去  
邵子以運經世之篇紀事始堯訖五代君續紀二百七

十五年之事起庚申宋興終甲午金亡名曰經世續書  
從葬師得葬術富者一游一夏並師其學予進之翰林  
學士程公亦待以殊禮君資識不凡自知讀書為文於  
飲食男女之欲澹如也自少不畜婢妾每日對賓客食  
於外未嘗私有口腹之奉志極高廣而一無所成生長  
富家而卒以困阨其命也夫其命也夫君之父諱鳳翔  
以禦寇得仕官至從事郎君生三十五日而為叔父後  
所後父諱莘亦以招賊功補將仕郎所後母黃氏鞠子



甚慈配康氏有婦德共君守約而不怨子男四世忠教  
忠保忠俱能數學元忠早卒女四適范適陳適謝適游  
二女亦先卒君生於端平乙未五月終於大德丁未十  
一月葬於十洞所居之後君嘗囑其子求程公書墓額  
而予為誌銘君沒之後予有遠役未暇作也今乃叙君  
平生大槩碣於墓而繫之以銘銘曰

志所可期才弗與施力所可為命弗與時直驚橫馳卒  
坐蹇羈匪不深知寧不深知厥聞永垂徵此銘辭

金谿余瑞卿墓誌銘

有文學有賢行壽矣富矣又子孫衆多隱居不求聞無  
幾微事嬰懷考終於牖下之數者有其二三已難金谿  
余瑞卿兼而有焉其所得於天何其厚哉君諱斗祥族  
所聚曰大原家西山三百載遠祖迪功諱彥和曾王考  
諱曦王考諱文端俱以文行稱考諱應時善書工詩王  
妣張夫人淙溪望族君夫人兄之子命為世孫五歲入  
學日記數百言長治舉子詞賦所修日益比弱冠與黃

君炎薦同試舉場黃預貢文同而得失異君愈自信自勵試補國學生凡三輒不偶科舉事廢教諸子仍舊業每自律以尺度他日有司試儒仍免徵役君二子並以詞賦中選君身總家務夜燈猶不廢書下至伎術亦且通習詩莊重縝栗肖其為人內寬外嚴有古長者之風終日整肅初寒盛夏不變望之莫不敬畏恪謹禮節長幼卑尊繩繩如也雖接下賤無懈怠容見徹守固外物無能動其中逮養四親致孝喪祭一無違禮於張氏雖

據禮降服而情則隆建祠買田麗淙溪桐林寺以貽永久所居種竹萬个宮講周公方書竹心二字扁其楣平生無他好唯適意佳山水過白馬之珠溪欣然會心捐金得之築觀曰仁壽一歲率再三往與良朋飲酒賦詩其間至大壬子七月四日無疾而逝得年七十有九初娶危氏再娶吳氏子男五璉鳳麟鸚驥女一適吳孫男十瑀琇珂璫琦璋若蘭蒙女五曾孫女二卒之明年諸孤將以十二月某日葬於珠溪之北其宗人前大學

進士鑰狀君之行來徵銘予知進士君因進士君之言  
知君既叙次其狀如右銘曰

玉韞珠潛山輝澤媚厥幽孔昭昭視來世

黃亨叔墓誌銘

臨川黃君亨叔工進士詩賦少負能聲亞於其宗兄知  
縣君仲明仲明與予同為咸淳庚午貢士其年亨叔亦  
中選溢貢額外明年仲明與予試禮部亨叔試補國學  
弟子員仲明登進士丙科予罷歸亨叔亦罷歸越四十

有三年仲明過予言曰亨叔死矣葬有期炎發狀其行  
子其銘諸予悵惋久之曰科舉取士如博懸於投非智  
力所能與以亨叔之藝而不偶命也夫亨叔諱泰亨家  
臨川珠山其先繇豫章徙曾大父文廣大父彥益父天  
德母王氏繼饒氏亨叔早從良師友講肄文思竒蔚氣  
格雄絕為流輩所推英英出庶士右科舉廢學專於身  
治移於家事親禮無違丁時多虞不以公私事貽親憂  
父喪致哀孝繼母如母友弟淑子藹然仁讓之風前時

井里弗靖或欲相撻為不義諄諭善誘俾愧悟而止官  
委覈產一槩公平獎革賦均至今人蒙其利宅東有閣  
扁曰見遠閣東有軒扁曰東明燕坐之室嘉樹森立活  
水鏡靜扁曰梅塘一家父子兄弟文物雍容賓朋觴詠  
無虛日皇慶癸丑春微恙諸子竭誠籲天調膳進藥獲  
延數月起處如常雖疾猶娛書不輟手寫邵子觀易吟  
又自吟云久約松筠豎晚節病逢蒲柳望秋時此其絕  
筆也一日進弟若子於前囑以家事教以孝友敬順親

親賢賢輯鄰恤衆之道知舊省疾舉手揖別曰吾逝矣  
六月廿二日也享年六十有八九月十九日墓里之鳳  
皇窠妻周氏先一年卒子男四伯曰士廉仲曰士清叔  
曰士剛玉成季子也命以為適孫女一適危龍從孫女  
六銘曰

維藝之優外蹇於求維德之周內豐於修有章其幽有  
繇其留靡疚靡郵永藏斯邱

元將仕佐郎贛州路同知會昌州事夏侯墓誌銘



夏友蘭字幼安初名九鼎撫樂安曾田人後徙蘭原世  
以材武長軍籍幼安亦弓馬便習讀書不及卒業夙慧  
自能為詩逮其父時任家督精簿書稽錢穀出入欺弊  
無所容父卒家力逾大凡事提綱衆目各界所司謙厚  
文雅聲譽四達聞風締交者自遠而至每歎儒流識卑  
言陋遇方外人傾心嚮慕邑尉明安達爾志同意合俱  
造吾門受學獲聞往聖先賢所言性命道德之懿濯去  
舊見自是假真贋偽者不能惑當父忌日哭泣盡哀事

母婉順致養唯謹家居之儀時祭之禮一遵司馬氏朱氏所定邑東門外創建書院施田贍給敦請名儒詹貢士掌教其事聞上官為設官家有內塾教子又有外塾普及親鄰諸幼之可教者月朔弦望遠近賓朋內外子弟深衣會講以身率先升降進退威儀整肅如學校規詩文自出胸臆無一語塵腐星數葬法風鑑占驗等術靡不探討或勸之仕則曰是有命焉不可倖致也予在國子監幼安白慈親願觀國光親許遂趨京師又趨上

都覲日表於潛邸得旨從集賢大學士李公游出入禁  
闈必從明年龍飛御極李公秉政奏授將仕佐郎同知  
會昌州事皇慶元年春南歸秋至官一月聞恩旨下護  
持所創書院亟歸迎拜至家感疾再閱月而終十月廿  
四日也二年十二月廿七日葬於宅東之圃幼安生長  
將家衣被儒術深潛端重山立時行中州外域顯官貴  
戚一見共談起敬起愛不信其為楚產也平居處事詳  
審年四十三始仕廉仁外著士民悅服比聞其喪悵快

缺望父諱雄管軍百戶鎮撫樂安縣三翼母劉氏慈善  
好施綜理內外事秩然娶前吏部侍郎李公曾孫女男  
志學以七品官之子充國學弟子員子於幼安之不得  
壽也痛之惜之志而銘之曰

家有百井身則三命雖嗇於年順受其正

故宋文林郎道州判官何君墓碣銘

宋之季撫州進士科名之盛推樂安何氏蓋一家兄弟  
成名者四人道州判官文林屠諱堯字唐佐其次在三年

二十一偕伯兄霖與貢明年同試禮部伯兄登乙科  
越三年君再與貢明年遂中禮部選時國恤不親策士  
以省試名數先後第甲乙君名殿選郊祀恩乃得仕越  
三年授迪功郎靜江府修仁縣尉兼主簿越五年之官  
廣西提點刑獄兼提舉常平茶鹽事號能吏聲實素隆  
君投啟事以見中意留為屬俾掌撰述辟監軍資庫而  
廣西經畧安撫兼轉運使得二鉅人相繼嘉君有文亦  
羅致幕下凡箋表及慶弔於中朝達官告諭下鄰壤蕃

國一一屬筆馬三使長各舉闕陞循從政郎守舊職秩滿再調轉文林郎道州軍事判官是年伯兄班見改官知宜章縣仲兄希之試策甲科第六人教授永州季弟夢牛亦進士出身主廣昌簿兄弟聚於行都同時受新命以歸二親具慶聞者榮之明年二親年皆七十四子袍笏稱壽里中傳夸為盛事縣大夫表所居曰叢桂榮親之坊未幾歷數改連丁內外艱伯兄即世弟逆充前人所不堪君處之裕如扁書塾曰道心其後一新堂構

更扁曰乾坤草亭自號為漫翁仲兄教授暨族之諸甥  
詹貢士崇朴比屋而處三人年德相輩行出入必偕人  
目為三老過者必禮於其廬仕者問民休戚諮政得失  
無虛日君靜重簡默然諾不苟門絕請託是以交遊不  
間遠邇始終敬服不渝初娶崇仁吳氏其外姑饒氏再  
歸光山黃主簿輝應黃以工駢儷客制閫數數共君語  
君所作四六典麗瞻密應律合度淵原盖有自云他文  
溫淳雅健諸詩謹嚴精妥近體尤長樂府長短句綽有

風致昔在理宗時閩人劉公克莊馳文譽資望堪掌制  
以世賞非進士於例不可朝廷憐才特賜進士出身入  
翰苑識者評君四六雜文詩詞與劉伯仲且有科名擬  
君所到不減於劉而竟不獲大用惜哉平生論著多不  
存存者有草亭漫槁深衣圖說郭孝子後傳所編纂有  
小學提綱資暇錄鰲溪羣賢詩選君丰儀秀整辭氣雖  
和喜愠不形於色幅巾野服爐香書卷飄飄有塵外趣  
乍見疑為公侯世家子不知為寒素士也生淳祐辛丑



五月九日終至大庚戌六月五日高祖思以五舉推恩  
仕容州司法曾祖庚祖湛父宏中三世不仕母董氏內  
外教養飭子以學故君兄弟悉能有成元配吳氏卒於  
廣西生男三友直友端友成再娶外姑饒氏妹之女陳  
氏生男四友學友德友實友政友成先十八年卒友德  
後三月亦卒女二適饒適詹孫男七梅慶梅馥梅鼎梅  
碩梅玉梅相梅午女七適陳適游適黃一許適陳一許適  
潘餘幼曾孫男一孔年更名誠卒之年十月三日丙午

葬楊林之原君長子八歲蚤相好晚益相知嘗謂君詩  
文可傳而諸孤以宜章之子友道所述行實來徵銘不  
敢辭也銘曰

玉也挺挺冰也炯炯超蛻塹滋表表脫穎柴桑永初沉  
寥里居有來睢盱而式斯廬䟽越流音贖贖充耳繫疇  
與聆期曠之俟耆造云遠索焉弗遺昭銘幽宅子衷孔  
悲

游恭叔墓銘

游恭叔與子同年生日予為長其神情朗朗如秋月之瑩其意氣藹藹如春陽之溫雖有道之士不是過居撫樂安天授鄉梅山里少讀書能文壯罹兵禍幸不死俘以去既得釋而還相其父治生業日長日盛數年資甲一鄉然皆敦本務實積累所致未嘗侵刻以取贏兼并以自廣異乎世之不仁而富者家邇通道凡南北往來貴勢閒居之人及門一以禮接饗殮之具信宿之舍雖甚叢雜紛擾殊無厭倦意是以貴賤賢愚靡不悅懌

其卒也人悵快懷思焉善察地理暇日杖履從容求佳山水處登高望遠悠然自適人莫能測也考諱士文妣曾氏恭叔諱德昭娶曾氏子男四劬勉方茂功女二孫男七應誠應陵應岳應戍大年應丑應春女十有二弟德暉先二十有三年卒有子一人遺命命子劬分其資之半與之生之日宋淳祐己酉冬仲旬之五卒之日元至大辛亥春仲旬之九其年三月十日葬於懷仁里之古石原其卒其葬子留京師皇慶壬子冬予始至

家茂功之子大年奉父命來請曰知吾父者先生宜有  
述以傳不朽予不得辭乃叙而銘之銘曰

吁嗟鳳麟若而人鄉有遺惠門有賓長才恢恢行恂恂  
今其死矣誰與倫巴山之陰宰木春德人所宅古荀陳

故教諭劉君墓碣

沅江路儒學教諭劉某之父教諭君既卒既葬且二十  
年某能世父業以儒學起家慊然以生事死葬之孝為  
未足思欲揚父之名於不朽今江西等處行中書省郎

中楊君於劉為鄉人乃因楊君屬行省理問所知事趙君書來請銘以碣諸墓嗚呼孝子之心至是可嘉矣夫可悲矣夫謹按教諭君行實狀君諱某字巨川關西延安人金季罹兵禍轉徙至博尋寓莘縣就段輔之學歲壬子官閱實戶口得隸儒籍遂家於莘年耆學富公論推舉充縣學教諭喪亂之餘文事廢弛春秋釋奠無從取辦君擇後進十數上名於官復其身人始知勸由是學徒嚮方廟祀如禮君孝友慈厚歲時薦羞追慕二親

痛不獲歸省塋隴引領西望未嘗不泫然流涕初延安  
既陷族屬散亡君惟一兄早世兄子亦被俘掠事甫定  
百計搜訪垂三十年莫測存否一旦家之人走報曰有  
客及門音類西人亟出諦視見其顏貌肖兄即呼小字  
果兄子也相向而哭既而輟哭歎且喜曰吾宗有傳矣  
資之白金俾之服賈以自贍給彼醕酒不檢悉蕩其資  
君愛之如初家有女使或笞罵之君輒戒止曰吾曹身  
經戎馬免為囚奴受役於人今得役人以代汝薪水之

勞可善御之無若此也君達於死生言人當修身以俟  
命年七十有八無疾而逝至元辛卯二月廿四日也娶  
張氏生二男一女先二十六年卒再娶莫氏靜默淑惠  
撫兒女如已出相君理家三十年黨閭稱繼母之賢必  
指以為法則教授某君之長子某其次女適聊城王氏  
孫男四某某某女五長適縣令宋某餘幼劉氏先墓  
在延安自君夫婦始葬莘縣之西北嗚呼中原兵禍之  
慘往往家無噍類君奔走流離依託善地以蕃育其子



孫為人所尊敬得考終又得壽子不墜家聲思孝於其親  
無有窮也君之所以致此者豈偶然哉銘曰

猗嗟巨川維身之全維名之傳胡然而然維行靡愆有  
鑑在天維子象賢有耀在泉有溥斯原有肇斯阡永永  
歲年於昭巨川


游竹坡墓誌銘

樂安功陂之游為富族而竹坡居士崇儒尚文以淑其  
子居士果有以異於等倫乎曰有利必取羸凶歲必閉

糶騰價富不仁者率若是辛未大饑郡勸分三日一糶居士謂饑者豈能待三日而後食請於邑令計糶戶口數分畀富家日給其食至早稻熟乃已邑令高其義此所以異者一丙子寇犯邑鄉閭震驚居士家崇仁樂安兩界間鄰邑藉為保障郡命彈壓二境他人處此輒怙官勢軒輊新附未定之民脅取其資或以報睚眦怨居士不然相安於無事此所以異者二世俗議昏姻擇家力勝己者覲其裝送之厚居士二子長曰中娶鄔次曰

申娶饒娶吳皆清門貧女畧不問其所將此所以異者  
三甲午春寇猝至獲居士以去咸危之意必不免寇以  
其長者至中途釋之以歸蓋其平日處心行事有以異  
於人故其受報於天也亦異居士易直謹厚諱德洪字  
宏甫得年八十有二卒以大德乙巳正月二日葬以至  
大某年月日娶李氏侍郎公之族姓女孫先八年卒女  
二俱適黃孫男四謙泰異復孫女五適陳虞黃何一未  
嫁中數數徵予銘銘曰

世之訾儒謂迂謂拘有識斯殊淑後以書



吳文正集卷七十四

欽定四庫全書

集部

吳文正集卷七十五

御史<sub>臣</sub>邱文愷覆勘

武英殿纂修中允臣馬啟泰

欽定四庫全書

吳文正集卷七十五

墓志銘

項振宗墓志銘

始子在園子監集賢直學士文陞以其鄉人項時俊見  
子既移疾去時俊亦以同知永昌府事南歸歸之次月  
其父司丞君卒卒之明年命客持光澤主簿劉將孫狀

元 吳澄 撰

來謁銘以葬予閱狀喟然曰噫大運有興衰飛奔其間者與之俱或前之烜赫而泯泯以微或昔之隱約而齟齬以熾雖小而一家之數大而一代之運若邈乎遠絕而不相關然以疏通卓犖之才一紛紜膠轕之會左右信縮弛張闔闢慮無不中行無不獲非有所承藉緣循也非有所值遇垂成也而聲生氣長日進月益勃然興而莫之禦是其遇數之符宰物者久擬之以待斯今蓋或陰相默協於冥冥之中而豈其日為自致於昭昭之

地如此哉君舍龍泉人自少侗儻不羣隘陋邱井翺翔  
淮漢視一時以名相軋以利相雄之流稷稷營營心易  
而氣吞之南邦內屬新令未狎故家右族往往失色於  
風震雨凌之下特見定力履之若夷人皆芒芒而已陽  
陽彼方愕愕而此綽綽不惟儕輩望之若不可階而官  
府倚之若砥柱然不可湏臾舍龍泉縮江湖交廣之郊  
近已狃獷不易櫛理遠鄙連岡延袤草木蓊蓊干霄蔽  
日虎豹豺狼鹿豕之宅姦藏慝聚固其所承平猶或弗



率況動勦反及時邪丙子以後甲午以前十八年靡  
有寧歲茶陵以南桂嶺以東五六里靡有善地近而怙  
亂者沸境內遠而阻險者環境外邑苟旦夕於羈縻羣  
老歲月於禽獮孰視幾末如之何運竒制勝卒底于平徼  
夫人誰馬領此廣獮鳴張分合如雲刈老弱走強壯俘  
子女掠寶貨火室廬殘蕪逼于郭郭以至上勤宥府之兵  
鉅公督戎親履遐僻於郊迎次獨被禮接問計安出境  
如所陳以磔其渠披其友由是邑遂無警若是者何也

形勢機權征謀治法一不凝滯於心需餉辦徵衆衆  
集一不牽掣於人智也力也智力相湏不懾不懈筭無  
遺策動有成功也固宜而又有難者戍軍當詣南豐萬  
夫之長臨遣倉卒生變一呼羣潰單騎往諭片言而禽  
然定就道如律訖無囂譁此非可以力劫智給而得其  
信服夫豈孱夫庸人之所可能哉其艱其勤之餘汲汲  
以善事為樂倡義平難自丙戌始凶歲不令騰踴辛卯  
饑給糴戶三千直減其價之半廩五發而及新施粥食

餓施粟賑貧又廣難以瞻遠土斂有先備散有成規爾  
後歲雖饑而不害邑校初燬因仍簡陋弗克如舊拓而  
敞之增而廣之矣再燬則撤而新之基崇構美門廡庖  
廩具視昔有加焉落成舍萊士聚三日饗殮不以費公  
儲田租隱漏覈實而歸之學文節縮其贏以造祭器之  
宜有者事聞于朝特命旌表邑有浮梁通南北有田以  
脩脩完田沒入官而梁廢民病涉出力造舟以渡一歲  
輒敞乃復浮梁兩屋甃石數千尺其守護之也隄有屋

屋有僧僧有徒歲有常給辛郊以來舟梁亦四易矣交  
游敦誼終始弗渝赴急解紛捐千金等一羽佛者老者  
民無告者士無業者凡可惠利於人者凡為神為人為  
公為私有工有役者苟有求無不應也八歲而孤事母  
至孝壽踰八十養送如禮上有三兄恭順怡怡季兄早  
逝撫其子如己子肖懷磊落貫穿今古雖老猶不廢書  
博覽強記論辨亶亶聽者聳然往歲寇平當路勗功以  
上議賜爵秩適有星誤命格不下慨然辭知已出都門

還舊隱建延慶道院築玉林別墅預營壽藏逍遙自適  
澹乎無復有用世之志賑荒格例應賞授進士副尉兩  
浙都轉運鹽使司袁部場鹽司丞匪其欲也初名應宗  
字振宗以如常副其字後遂以字行生淳祐辛亥十月  
之朏終皇慶壬子五月之朏葬于玉林手卜之兆癸丑  
二月十有二日也曾祖某祖某考某妣王氏娶王氏子  
男三長丙孫時俊其次官承事郎季申孫女二一適楊  
一先卒孫男六女一予觀有祿有位之人食其食不事

其事十盖八九今也非居侯伯之位非享公上之祿徒以素封儼於九命之貴齊於千乘之富而羣邑鄉里事之重大艱難衆之旁觀縮手者必項氏焉歸甚勞而不辭甚費而不惜一旦無是皇皇失其所資偃偃失其所依若不能以獨立於世則狀之所述以為百年之思百里之澤徼斯人寧復有斯邑者豈虛美哉嗚呼此可為識者道也銘曰

猗嗟才難有夷斯艱有綸斯繁或汗彼顏而此閑閑刃

游節間梗楠章諸枝條扶疏隱庇萬夫豈其櫟樗可棟  
可榱不逢其湏逝矣疇依已矣疇資身後之思功如所  
懷用不讎才天乎人哉

有元萬載縣尹曾君夫人陳氏墓志銘

夫人諱柔應臨江新淦陳氏歸吉之永豐嬪于曾太平  
路儒學教授如圭之母袁州路萬載縣尹某之妻宋某  
官追封武城羣伯之冢婦宋戶部侍郎寶章閣待制諱  
伯大之子也昔宋咸淳間曾陳二公俱列言路震耀一

時士大夫想慕風采二家門第等埒相望不二百里締  
昏姻於聲實翕赫之時夫人有賢行歸事舅姑孝謹未  
幾天厯改亂離中處常處變曲當其宜以克完克安後  
城武公即世相夫君持家萬載二弟皆幼鞠誨如子迄  
用樹立仲氏直翰林季氏名在太常萬載卒時子年十  
七晨夕嚴飭冠之室之以逮于仕猶其亡父志也內外戚  
疏長少貴賤待之咸中禮節喜愠不形綜理家事繩繩  
如也而人未嘗聞其聲為伯兄繼絕弟奉母來依有居



有養又為之繼室而昏其長子墓其四喪厚於父族者  
如此萬載嘗營別業於郡城皇慶壬子夫人徙居焉延  
祐甲寅五月己巳卒年三十五六月壬午殯廬陵儒行  
鄉之螺山將以是年冬葬子男一女六壻陳王蕭陳鄧  
周也孫男二昭福華壽女二翰林君太常君援韓吏部  
例加服期以報嫂氏恩予與二君遊故為之銘銘曰  
予于名門女子名門淑女孝婦令妻慈母而於此乎墳

樂安夏鎮撫墓誌銘

鎮撫諱楷字淑芙姓夏氏族在崇仁之成岡宋南渡時  
以撫崇仁吉永豐二縣相距闊遠遂密聚二鄙間籍土  
軍防遏置砦崇仁之曾曰夏氏之先領衆守戍因家焉  
既而分崇仁三鄉永豐一鄉置樂安縣曾曰遂隸樂安  
鎮撫為人慷慨易直不事機巧志氣超邁材質沉毅精  
於技擊一可當十禦寇輒以技勝國朝收附江南遐陬  
尚有弗靖大軍所嚮必率所部前驅若著勞績北來戎  
帥咸異其能受撫州路管軍總管府命鎮撫三翼又受

江西等處行樞密院命長百夫先是縣有暴卒肆惡吞  
噬家之所有悉遭劫奪執置囹圄幾不自保會暴卒伏  
誅始得復業徙居蘭原家益饒裕資右一縣謙謙自卑  
每遇凶歲賑饑周貧人懷其惠至元癸巳四月十六日  
卒年四十六父諱岳母聶氏娶劉氏子男一友蘭將仕  
佐郎同知會昌州事女二適詹得之譚遇孫男志學國  
學生初葬桐岡遷巴壤又遷黃潭又遷團墅延祐甲寅  
某月某日志學奉祖母教安厝於闔黎銘曰

其勇也育而冠部曲其智也蠡而甲黨里弗殫其施尚  
表所詒

故宋江州德化縣丞朱君墓碣銘

樂安天授鄉之朱其族最久而蕃唐末有為郡司馬者  
以材武雄其里子繪稱為大夫八世孫奕富饒侗儻清  
江謝尚書諤志其墓奕生安民安民生克永克永生居  
敬居敬生德化縣丞桂發工進士詩賦與從兄煥齊名  
其從兄終身不偶宋末乃有一子入太學陞內舍縣丞

君字光甫年二十有一貢于鄉次年淳祐辛丑至開慶  
己未景定壬戌咸淳乙丑戊辰凡五試禮部戊辰族子  
一鶚暨金溪一士同試君為詳定其文俱得進士出身  
而君獨黜次五到禮部恩對策殿廷授迪功郎吉州太  
和縣主學越四年奉母之官時母年八十有一太和多  
士邑有壬戌進士第三人張槐應鄰境有丙辰進士第  
一人文天祥每縣學春秋試二家子弟賓客各獻其藝  
君遴選公明所取所黜靡不精當二達官心服焉文書

古香二大字名君家塾以示相敬君既仕庚午癸酉兩  
赴轉運司解試並與貢辛未甲戌又兩試禮部亦不利  
授江州德化縣丞以歸丁母憂自是不復仕寓居僻壤  
安貧自樂澹如也大元大德戊戌十月十有七日終年  
七十有九庚子十有一月某日葬橫坑原配黃氏後君  
五年終年八十有七葬古城四子男五遂珠魏翁早夭  
逸世其學女一適鄔孫男六及獻廸祖生午望女一適  
鄔曾孫男三三孫吉孫善孫女二延祐甲寅冬逸謂澄

曰先君葬十有五年而墓碣未樹子其畀之辭君之齒  
澄父黨也素相悉乃不讓而為之銘銘曰

維藝之精維士之程三與賓興七試禮部迄不一成而  
謂是科足羅豪英勿眩斯名維實其貞維古其承

故箕坡居士陳君墓誌銘

箕坡居士姓陳氏諱榮祖字仲顯居崇仁縣崇仁鄉之  
苦竹宋端平丙申十二月二十九日生方其少也諸大  
父有擢科取貴者駸駸進取而居士恂恂雅飾人稱為

佳子弟及其老也羣從間有乘時取富者赫赫熾盛而居士優優謹守人稱為賢父兄嗚呼駸駸於名者既如夢幻赫赫於利者亦如露電而居士巋然獨存如經鍛之金經霜之木不虧不渝衣食足以給子孫足以紹康寧壽考年七十九而終其可謂鄉之善人已娶楊氏子曰賢孫孫曰時曰賜曾孫曰善孫曰仁壽曰宜壽曰萬孫曰延祐曰福孫居士之卒也延祐甲寅十一月十二日其葬也次年乙卯十二月廿八日其兆石塘之原距



家甚邇其穴首乙趾辛孫時好讀書能吟詩居士甚愛之得年三十三先五月而卒後五日而葬銘曰

履靜視動猶風中塵彼有聚散此無悲欣行孚于一福建厥身牢木千春居士之墳

故鑑湖居士李君墓誌銘

君李氏諱峻字至道寶章閣待制正奉大夫吏部侍郎諱劉之孫文林郎荆湖制置司幹辦公事諱修之子恂恂謹飭似不能言而工進士詩賦與寒門試藝者爭先

一難也娶容管安撫孫女出壻于陳與親異處而晨昏侍養之禮無曠二難也妣工部尚書何公之孫三兄皆前妣所生性行各異而事之悉中宜節人謂之恭弟三難也儉約恬淡無貪媚心而獨能保有所受貲業有增無虧四難也宋既亡弗萌仕進想終身讀誦家藏舊書晚年一目失明尚能作小字侍郎公初有類彙版行翰苑已後文辭多逸不傳君輯錄成帙名曰類彙續編又自纂韻註甚詳後見古今韻會遂不復出生於宋寶

祐癸丑之八月卒於元延祐甲寅之七月其明年八月  
壬寅葬長安鄉嘉會里之南阜祔妣何氏墓右子三積  
穎祺孫男孫女凡五嘗戒積曰家無它畜惟前朝宸翰  
為家寶慎勿失墜余素善君積來請銘銘曰  
名家之胄而淑而秀以昭于後其可不朽

故次男吳袞墓銘

吳袞字士工次尚三澄之第二子也幼而明粹長而傀  
奇學法書學詩文皆能之至元壬午七月己卯生至大

已酉正月丁未卒殯于後園延祐乙卯六月甲申塋于  
橫江湓田坑首兌趾震娶袁子四男蕃女賢羸寶其塋  
也父澄銘其墓曰  
生之勤死之閔嗇汝身以豐汝後人

故楚清先生龔君墓碣銘

嗚呼宋末士大夫渙忍脂韋便身迷國者滔滔而是習  
熟成風恬不為怪固有稍負氣節於未仕時亦不能不  
改變於既仕之後嗚呼余安得不於吾楚清先生龔君

而致其慨慕也哉君資稟峻邁文辭精緻年二十二貢于鄉二十八再貢賦中第一明年試禮部賦中第二廷對策中第六以咸淳初策士特恩授文林郎隆興觀察推官秩滿除兩浙運司幹辦公事遷臨安觀察判官又除福建運司幹辦公事轉儒林郎侃侃剛直不徇不詭應務明決略無留難始仕於洪繼仕於浙幕府擬畫任法據理甚屬久諳律令為僚者推服為長者器異焉天厯告終辟地野外如永初元亮如黃初幼安如楚之兩

龔清而不污號曰楚清居士其志可知已世氛頗靜仍  
還城中混迹編岷沉晦免禍介特之操皦然不渝少年  
擢巍科不十年而肥遯名教自樂餘四十年所蘊雖不  
獲施然論文講學端已淑人踐履持循俯仰無愧遠者  
慕之近者宗之仕者禮之學者師之為古文簡健光潔  
根著理道求序記志銘者相屬有集四十卷及宦遊擬  
橐嘗自為序比其逝也靡不流涕太息以為無復有斯  
人也天爵之尊不猶多於人爵之貴乎君諱孟夔字龍

友莫本系龔所後也臨川龔自昭武徙大王考誠之王  
考良英考方鄉貢進士妣汪氏贈孺人君亦汪出也故  
孺人子之吉州判官名若通山縣尉名雷復者莫氏二  
兄也咸淳辛未伯兄以太學進士第黃甲仲兄以南省  
進士賜出身而君受兩浙之命時莫氏母無恙見三子  
俱貴部使名其所居之坊曰叢桂榮親君仕進時洪庾  
歲收緡錢數百歸監納官揮卻不受其它日給日共舊  
例所得一切屏絕唯食廩稍而已所贏又以分濟同列

之貧凡死無所歸求有未遂者苟可援助必盡其力至  
閑退時於人之急雖不能周亦惻惻悵閔初父有庶弟  
凌蔑寡幼君之母子重罹困阨此叔之子不慧死而絕  
祀乃為立後保護遺業以逮至今人謂以德報怨君曰  
宜然奚德之云襟懷坦易論議平實嗜義如渴疾惡如  
仇見人有善欣懌稱揚聞人有過顰蹙隱諱別白是非  
不少假借而後進寸長倍加獎與其樂成美如此所受  
舉薦者安撫吳堅曹孝慶轉運陳合朱浚監察御史曾



淵子所與同僚者節度判官黎立武節度推官蕭立之  
季年所善者曾縣令子良異代所師者陸先生子靜也  
宋嘉熙庚子五月中一生之日也今延祐乙卯五月上  
二卒之日也是年六月丁酉葬之期也鄉曰積善原曰  
西楹塋之宅也配晁氏文元文莊之裔有婦德子自厚  
有文聲女子適侯並先卒子婦制置司主管機宜文字  
鄧晉孫之女夫亡子幼貞一自誓長育其子以紹家學  
女孫壻張觀朱夏皆儒家子狀君之行者唐浚也專門

治春秋長於君二歲貧而有守蓋與君合志碣墓而請  
銘者君之孫文潛也為之銘者鄉之後進吳澄也銘曰  
崇崇儒科曷曷雄文乍試吏事如觴解紛望實峻明交  
章薦聞選悞包羞吞聲敢云歲月幾何挂藜看雲耿耿  
于中絢錦襲纁綽綽嗣學巧厥餘芬維堅不刑維完不  
斲有撫斯原宿草芸芸百世吁嘻清德之墳

宜黃譚遇妻夏氏墓志

將仕佐郎贛州路同知會昌州事夏有蘭之女弟淑明

至元丙戌六月十九夜生生十七年而奉政大夫江西  
等處儒學提舉譚文森之子遇來壻于夏氏有子一人  
曰道生為譚氏婦九年而卒于父母家至大庚戌六月  
十二日也卒時凡在京師越三年四月自京師至乃治  
葬葬參原首亥趾壬延慶壬子九月二十四也父諱雄先  
卒母劉氏甚鍾愛其卒也悲其葬也命其外甥道生造  
吾門再拜請志遂刻文于其墓云

李弘道墓志銘

宋寶章閣待制正奉大夫吏部侍郎李公之孫疇字弘道文林郎沿江制置使司幹辦公事諱修之嫡長子也侍郎掌制時生命之日制保養太保攜抱終日不出帷房因得痼疾母譚夫人恩之甚勤食寢作息躬自顧視逮至有室猶然自幼穎悟雖疾不廢書一覽終身不忘經史典故記憶淹貫信奉釋老二教晨夕香燈虔誦敬禮隆寒盛暑不輟侍郎既任子賞延諸孫該受登仕郎以疾讓于弟略友愛出自天性未嘗疾聲厲色恬淡忘

世毫髮事不嬰于懷娶知金溪縣黃元孫女元侍郎同年進士逢時多虞而外無拂意蓋內有賢助云黃氏先二十有八年卒子貞年十有三竭力幹蠱家用小康男婚女嫁俱畢嘗燕處貞侍特書褒美之辭以畀貞受藏唯謹次子允思以制幹命俾後陽春令濤之子寘貞承志均家產為二不求贏焉女一適文虎一適夏有蘭一適鄔文傳李氏世居崇仁鄉之白沙侍郎貴顯始徙于邑江南新附法令未孚軍寇交擾避地靡定依貞婦家

數年時既寧謚復歸白沙築室大德丙午正月八日卒  
年六十有七子少以里中子識制幹公交游三世矣貞  
數數為其父請銘延祐甲寅某月日貞允思奉柩葬于  
宜風里上塘祖塋之左乃為銘曰

維兄友以克讓其貴維子亦興讓以克友于弟維身教  
不匱維家聞不墜以永于世世

臨川曾母劉氏墓志銘

臨川曾必榮之妻劉氏諱慧珍生宋淳祐辛卯之十一

月年四十三而卒其夫四男一女家又甚貧有欲奪其志及分異其子女者堅志不從卒全其節長其所生而室家之冢子泰來嘗為吏歸解其橐以所得進卻勿視曰吾教汝為士不使為吏汝若教學雖菽水缺供吾不憾否則為農為賈以養亦其次也今為吏必取所不當取惡用此為泰來慚懼自是不復為吏素不好華飾孀居即屏芳澤終其身不御前期與鄰婦訣微病三日而逝大元延祐乙卯十二月二十六日也既殯乃得塋地

里曰孝行山曰熊家畬以某年某月某日葬求銘者秦  
來也述行實者曾之族人與嗣也銘曰

天其夫弗肯渝於義士其子弗肯沒於利嗚呼雖古貞  
娶奚以尚茲



吳文正集卷七十五

欽定四庫全書

吳文正集卷七十六

元 吳澄 撰

墓志銘

故袁君主一甫墓志銘

主一姓袁氏諱立初字義夫生宋淳祐庚戌九月自少  
儻有志慷慨尚義習進士業應舉不中客州縣與其  
謀議如參佐然進士科既廢無復仕進想新附之民

地偏俗殊聞一令輒駭吏並緣為姦絲棼鼎沸莫克應承君處之得宜於家不貽父母憂同產賴以保所有庇及一鄉愚氓相挺為亂鋤其根株里居以寧遠近歸德焉富室禮為賓師諏度悉中理法多所裨益君倫紀篤厚意氣軒豁親故交遊懇懇用情靡不感悅至大庚戌十二月以疾終次年十一月葬于藝原延祐丁巳二月庚申改葬迴鄉祔母夫人墓左嗚呼古有鄉之賢能長治其民不出比閭族黨之間故上下相親如家人父子

袁君不必如古之仕於鄉而比閭族黨受其惠蓋無愧於古之才士也夫考諱摹承節郎監隆興府樵舍鎮妣曾氏進賢縣丞諱三德之孫女配何氏工部尚書諱異之從女孫也男三梅瑞彭澤縣教諭相瑞桐瑞女三端女平女安女中男中女皆先卒大庾縣令何子安之子隆孫道州判官何焄之子友成暨子之中子袞其壻也孫男二燾孫熹孫孫女四君與子相友如兄弟其卒也予在京師令於其改葬也而為之銘銘曰

生不試沒有遺惠留其慶以昌後裔

故縣尹蕭君墓志銘

蕭氏居贛寧都之小田至于君五世矣君之世父諱澣能詩有集曰芸莊五試禮部特奏授戶曹君之父諱立之詩宗江西派絕句有唐人風致其集曰水厓登進士科由鎮南軍節度推官班見改籍田令累官至通直掾攘之際擢為道守不及赴君通守之季子也諱士資字深可器識超異紹宋學文藝最優知時將多虞期以武

功奮就右選授承節郎及大兵至江南仲兄贊募鄉兵  
助時脩禦君請曰報國忠也寧家孝也二者不能兼兄  
居弟行帥李公不許遂往君奉二親依山險同鄉鄰保  
聚兄與大兵遇而止元師李公竒其才全其生詢其家  
世益加敬重君亦受知焉李公鎮廬陵命君招撫寧都  
降汀寇有功剡上隨達官入覲授從仕郎建昌廣昌尹  
承亂離後井里荒殘撫字有方戶增獄簡遭父喪去官  
再尹辰州廬溪寔五溪蠻洞之地烏言獸心御之得宜

靡不悅服茶溪洞反諭降其衆又遭母喪去官再入覲  
遷徵事郎辰州叙浦尹叙浦與盧溪鄰土俗相似治之  
一如盧溪前者洞蠻屢服屢叛招懷以德咸俾革面聞  
君有代渠魁復出鈔掠行省調兵勦捕君率先擣其巢  
穴寇窮感就擒君不有其功以讓軍官與同僚歸舊隱  
觴詠自樂視仕進澹如也越數年有南安路行用庫大  
使之命居官將再期解鈔上行省還及贛疾作至於南  
安益篤諸子扶侍至家寢疾七日而終君事二親孝雖

馳公事于外愛慕不少釋奔喪及門號踊慟絕兄弟怡  
怡終身無間言待宗戚友朋各中理節能得其歡豈弟  
慈祥接物和煦三為邑宰民皆去思嘗以自得扁書室  
所著詩文有吹劍吟北觀紀詠廬溪客語疾病召諸子  
及弟兄之子畢至教以和順娶連繼黃子男四若淵若  
潛若濟若涉女四孫男四楫孫吳孫周孫相孫君生於  
淳祐辛亥之冬卒於延祐丁巳之夏二年十一月廿七  
日葬于里之吟田長山頭予與君父子兄弟交遊四十



載父兄既沒而君獨存每歲書問往來至數四君少子  
三歲乃先棄予而逝乎諸孤求志銘叙而銘之銘曰  
深沉坦夷岷廓密微莊肅愉怡無莫有持文繼父規政  
若毋慈忘者已而存者如斯

故贛州教授李君夫人徐氏墓志銘

故贛州教授宜黃李君夫人徐氏以延祐丙辰九月從其  
子仲謀官贛之石城越明年丁巳五月甲戌卒仲謀具  
棺衾衣物歛于旅次恣得如禮是月壬辰奉柩以歸六

月丙午殯于正寢八月己酉葬仙桂鄉北華山左仲謀  
哀經求請銘嗚呼余視夫人之父猶大父視其夫猶伯  
叔視其子猶兄弟也可不銘諸竊謂婦德一而有三從  
焉德既賢所從亦賢世所希也蓋德之賢在已而出乎  
性所從之賢在人而係乎命苟非性於天者美命於天  
者厚其冒能然哉若夫人所得於天可謂美且厚已夫  
人儒家子諱懿如天性孝慈知書秉禮事姑色養無違  
執婦功至老不廢相其夫裕其家新宅舍饌賓親睦鄉

鄰教子孫一一中程度居近夫子廟遇朔望趣起拜謁  
中燬于火部使命有司重脩以仲謀董役夫人視如家  
事然有梓木可材或請以立夫子像即斧以畀嗚呼婦  
所先者德而夫人之德則賢也父鄉貢進士樂易敦龐  
諱桂得以工詞牋為儒林宗遠近從遊者數百咸稱為  
介軒先生嗚呼幼所從者父而夫人之父則賢也李君  
端嚴閑雅受業徐先生之門師持加器重而妻以女後  
入大學歷外內舍以上舍釋褐授迪功郎差贛州教授

嗚呼長所從者夫而夫人之夫亦賢也夫沒時子甫弱  
冠或謂所居差繇繁密盍徙以避夫人謂吾辛勤有此  
屋去將安之仲謀奉母應門純正疏通每為邑大夫所  
禮家賴以寧初仕南安路學錄夫人撫諸孫留于家再  
調石城縣教諭則曰吾昔嘗從夫仕贛今從子仕贛之  
支邑死不憾矣受祿養八閏月愉如也仲謀庶謹自守  
所至取重於官長取信於士友大率母教所成嗚呼老  
所從者子而夫人之子又賢也夫人生宋淳祐甲辰七

月得年七十有四次子良蚤卒女一適萊山山長鄒象  
孫男四除比冠階先十有九日殤夫人哭之慟由是嬰  
疾除後二十有八日亦殤陞尚幼孫女一適臨川徐銘

曰

天豐之平于其躬又于其所從孰如其豐天嗇之乎于  
其德不于其所食孰云其嗇

故陳副使夫人黃氏墓志銘

小曹金銀場副使陳仲南之配黃氏鄉貢進士慶老之

女宋淳祐壬子歲生十有六歲歸于陳毓質儒家性行  
溫淑相夫君治貴產日以盛大警戒相成慈儉如初宗  
族鄉黨咸稱賢助至元辛卯五月三日卒葬黃陵遷與  
村遷橋頭坑又遷炭窰坑距家一里許副使諱楠後二  
十有一年卒初生一女一男年皆幼罹寇禍能相讓就  
死再生一男曰炳文娶大學進士吳泰來女為婦孫男  
一世孫孫女二一許歸予之孫蕃一許歸斤村游之子

銘曰

桐儀靚頴順惠且賢維家之羸不羸其年永歲既安流慶  
壇媽

故臨川丁君墓志銘

丁氏系出齊侯呂伋漢時有寬有固至宋顯者尤衆其  
居臨川靈臺鄉者有叔才為士諱應桂父曰從龍以其  
子有志于學允益友過從應接不倦叔才所師皆一時  
工進士業者最後與今翰林承旨程距夫同門業成而  
科廢棲遯不求聞於時名書室曰竹所以厲其節戶既

隸儒籍俯就鄉邑學諭之職又游處臨汝書院遂與郡  
中諸耆宿俊彥日相親密間或吟詠以抒懷抱語尚平  
淡不事彫琢資稟剛直趣操清潔倜儻瀟散不拘不迂  
與人議論少不合則疾聲大呼然聚會歡笑浩歌暢飲  
和氣春如也待族姻鄉黨知舊交遊各中禮度娶龔氏  
先卒子榮翁克世其業教導臨汝叔才就養焉有疾乃  
奉以歸終于正寢其生也宋淳祐辛亥九月其卒也元  
延祐丁巳三月十有一日庚寅祔葬龔氏兆是年秋貢



余校文還過郡前臨汝山長趙思玄以榮翁來請銘余嘗序叔才詩矣今銘其墓也宜從老氏教子井山觀者季子有容也孫顯生相生銘曰

生而有章死而有藏我辭孔揚厥聞彌芳

大元將仕郎南豐州判官蕭君墓志銘

大元有江南一天下三十有九年始以進士科取士江西行中書省所統兩道貢士三十有二校藝之優劣定去取而吏議以襍犯違制有所黜校文者爭之一二達官

臨之亦務寬厚欲脩其名數卒不能奪吏議於是與選  
止十有八人而吉安一路居其六明年會試京師六人  
之中擢第者三楊景行羅曾蕭立夫也立夫字興吾吉  
水人年最少授將仕郎南豐州判官以歸八月己丑甫  
拜其親十月甲申遽終其身嗚呼其可悲也已其可悲  
也已大父諱符世在宋三貢于鄉五試于省咸淳戊辰  
省試詩義第一殿試中乙科任衡州推官父如愚守家  
學五子立夫仲也大父命之為世父後自幼敏悟其行

其識卓然特異體素羸弱歸途遘疾逾月小愈至家又疾  
竟不得起嗚呼其可悲也已其可悲也已生至元甲申  
終延祐乙卯越三年丁巳正月葬于松林之原兄鼎將  
父命來徵銘鄉試余曾校文得士如此而不見其用嗚  
呼其可悲也已其可悲也已妻彭氏男辰生葬之時年  
十有四矣銘曰

才與否與富與貧與貴與賤與壽與夭皆命也夫嗚呼  
立夫未可謂富而亦不貧未可謂貴而已不賤天畀以

才不畀以壽命不可期若之何其知與不知儔不予悲  
嗚呼噫嘻

故詩人吳伯秀墓志銘

伯秀諱廷蘭撫金溪之吉原少工進士業與從兄廷龍  
素齊名其從兄入太學登進士科調贛石城尉而伯秀  
不仕進士科既廢乃肆其力於詩甄意洽辭不甘心覩  
出魯直履常下跡不涉城府朝夕一室吟嘯自若中有  
亡聊不平一皆發於聲汪洋無涯涘衆口遞相傳誦其

佳句家素貧撫弟如子私篋無一錢箴言直行方見不  
善輒面折有急則力救之博記覽善誘誨後進宗黨惠  
其德而化者比比生宋淳祐三年四月得年八十元至  
治二年閏五月卒聞者靡不傷悼泰定元年十二月葬  
里之何家原前期其族孫舉及裴在京為之請銘既而  
其從子慶益來速銘噫宋三百年間撫之詩人前有謝  
逸謝邁後有趙崇憚而崇仁甘詠金谿曾子良亦以詩  
自好伯秀與曾同邑而為曾所敬余嘗觀其詩是可銘

也或謂伯秀之窮如孟東野抑天固窮其身以昌其詩  
乎余謂東野無後而伯秀三子諸孫森然克紹其世天  
之豐之也非東野所可及已而其詩又有不同者馬祖  
某父某俱弗耀娶王氏子三孫四銘曰

韞匱潛珍粲粲琪珣疇謂詩貧貞曜與倫滌破酸辛淵  
乎深淳不昌其身以儗其嗣人

故金陵逸士寅叔王君墓碣銘

皇慶元年春予在國子監以疾尋醫其夏過金陵郡士王

寅叔授子館執弟子禮而請學焉每為談士君子脩身  
謹行之槩言言胥契如水沃地其秋予適江而南則依  
依不忍別若有失也一年餘不相聞或傳寅叔死矣夫  
金陵東南大都會也然自吳晉以來常為用武之國事  
文學者視他郡為少况歸朝之後士之世業者或棄其  
業而他從寅叔一身獨膺持家幹蠱之任猶能有餘力  
不廢學其為學也又不卑卑於世儒記誦詞章之習上  
慕古之聖人賢人而為師可不謂特見卓識者哉而竟

不得年以死是可慨也已延祐五年冬予再至金陵寅  
叔之子謂吾父雖已就土而穴有水泉宜改葬乃營宅  
兆于城南西石子崗以明年正月四日奉柩而窆予為  
文以碣于其墓寅叔諱子清其先汴人宋紹興初來居  
雪州祖父諱某徙金陵祖母徐氏勤儉殖生父諱君祥  
早世仲父季父協心共事以致豐裕寅叔仲父之第三  
子也年十有四仲父亦卒為母命之為世父後事母張  
氏盡孝人無間言家務母及女兄主之寅叔惟讀書為學



而已他事一無所與數年後家浸以蠱始奉母命整飭別蠱補弊詳緩精審增益其田數十頃若不經意人服其能聲譽日起賢士大夫常造其門交朋甚驩而喜賙恤親戚無依賴者量其厚薄月有贍給名閹之子孫他方之寒俊不能自立者惻然矜念時與館穀嫁娶無力者捐貲贈之死無具者備棺葬之歲凶施米及為粥以食道路之人時疫施藥間命醫流往就其家胗視隆寒積雪則散褚衾木炭委于甚貧者之門而去不出主名

蓋其季父富而好施寅叔力不逮數倍而亦如之其所  
值之境為尤難母病藥必親嘗朝不暇盥櫛夜不脫冠  
帶而侍居喪三年不酒不肉不處於內未葬哀經不去  
身祭祀一遵司馬氏書儀朱氏家禮容無惰言無戲跬  
步必以古人為法式訓督諸子動循正道年長者遣之  
數百里外從名師娶氏相夫教子無違子四珩琚璜璫  
琚先殤女一婚盱江傅若川寅叔生宋咸淳己巳歲六  
月十有七日其卒皇慶癸丑歲十月十七日也銘曰

王氏世族濟濟純篤維學之勛肇自寅叔謂年宜崇未艾而終謂天昭昭豈其夢夢韞瑜韞瑾理弗潮盡蓄此有餘以錫遺厝石岡有墳石碣有文於戲寅叔雖亡猶存

故吳君慶長父墓誌銘

古豐城之長安與崇仁之青雲接境吳族居焉其初與崇仁之吳俱來自宣州宋之盛時有繇科第而仕者逮南渡以後崇仁之吳文學科第大顯于時而豐城之吳亦儒雅循良饒裕自殖巨公名士以德義相契交際過

從絡驛不絕至元間予至其鄉有五雲峯居士端嚴謹  
厚冠衣淳古儼然商皓之遺風適孫名演字慶長年二  
十餘嶷立侍側簡默凝重博洽秀異望之知為遠器一  
後着艾日以凋謝族之富盛者亦漸衰替獨慶長卓然  
樹立甲於一族戶門孔艱疏剔振治不勞而辦鄉鄰弗  
靖協心殲殄衆得奠枕賢力非甚有餘而饑歲率先賑  
救豪右愧焉名聲四馳遠近竦慕當路亦有知己而不  
願仕日與吟倡倡和自樂詩曰梅臞集晚年新居室以

處諸子婚嫁各當闕閱將遂閒適而年不待矣生寶祐  
丁巳十月之癸卯卒元延祐甲寅三月之己未越四年  
丁巳十二月戊午祔于六世祖妣曾夫人之兆原曰桐  
坑娶范繼黃子男六窶茶榘蔡崇女四范繼老黃延選  
葛真黃琛婿也長男長女先卒孫男六燦焯煥燿燿燿  
女九皆幼予之先自豐城徙世遠失其次慶長少余八  
歲視余猶兄也茶請銘故為銘銘曰

猗嗟具宗宣而撫洪世世有聞四海趨風豐城一族積

厚報豐猗嗟慶長亢宗之雄命未稱志維後之隆

故逸士趙君墓誌銘

進賢趙君若煥亮章甫宋宗室也年二十三值火祚訖  
賦草之茂三章援琴而歌與箕子麥秀歌同其悲哀時  
運之已失矢志義之不渝略無移咎推怨之意視麥秀  
之辭為優故予疑麥秀非箕子作也太史公輕信而悞  
取之尔安得如趙君之自傷而不他尤者哉君之志義類  
箕子無朝鮮之地可遠引於是陳迹閭放情山水高

晚廣覽遙吟孤嘯舒泄所懷弟若慳受當路索絡俾同  
遊徼君諷之來歸日共族從聚處讀書想古飲酒忘今  
澹如也與弟分財恣置不問唯取先世帶笏琴書君年  
將七十母萬氏夫人猶無恙孝養致樂朔望率子孫咸  
服拜堂下飲食必躬調胷生旦上壽自鳴匏絃起舞以  
怡親心母年八十五而卒既無親可事則專以教子為  
務賓客非端良不接所接輒觴詠盡歡邑校春秋釋奠  
齋宿陪位甚謹言論本經訓尚理趣謂學而不行非實

也吾喜玩易不以談說不以占驗日月無非易也披閱  
古書得精要語遂筆之策目曰脩忘告戒內外戚疏往  
徃按據所錄著述之存者中庸講議適情小葉逸民  
自得合若干卷其詩有云青山入遙望斂襟坐虛閣世  
故不可期冲懷有深託平居興夙寢衣未嘗免冠褰裳  
嗜飲不至醉每微酣令人歌淵明歸去來辭自吹洞簫  
以和書閣臨池扁曰曉泉曉喻明泉喻清也真淳和易  
恂恂信厚樂導人為善而不計從違是以人人敬且愛



馬重義輕利逋負不屑屑責償冬寒見凍者衣之歲饑見餓者食之初乙亥之兵鄉人有被俘者捐金贖之享年七十八大元至順辛未八月十一日晨起安坐而逝明年某月日葬邑西之雷岡先世魏悼惠王之一再傳安化軍節度使諱克整封高密侯生金紫光大夫叔旦光祿生右朝請大夫續之靖康之難由曹州徙豫章之進賢朝請生永豐主簿公礫君之高祖也曾祖彥瑄祖灑夫考時福俱不仕君娶周先二十年歿男三嗣賢

嗣麓嗣均一適艾芳閨孫男四女一嗣賢曰先子臨  
終命嗣賢求先生銘追念遺言惻惻哀慟庸敢以請予  
誦君歌辭嘉歎罔已夫有商孫子候服于周自古以然  
磐石之宗及今為庶君之志義若此賢於人也遠矣銘  
曰  
身之壽命長家之胤胄昌不與國而俱忘志義堂堂噫  
其可傷

吳文正集卷七十六